

935

1050



Politička organizacija građana "Naša stranka"  
Branilaca Sarajeva 5/1, 71 000 Sarajevo  
Telefon: 033 408 888; Fax: 033 408 881  
E-mail: nasastranka@nasastranka.ba  
Web: www.nasastranka.ba

**AMANDMANI**

Sarajevo, 24.07.2017.

**Sabina Ćudić**  
Zastupnica u Skupštini Kantona Sarajevo  
Naša stranka

Politička organizacija građana "Naša stranka"  
Branilaca Sarajeva 5/1, 71 000 Sarajevo  
KANTON SARAJEVO  
24-07-2017

Država	Općina	Broj	Broj
parčica	stranaka	odl.	priloga
01			

**Dostaviti:**

Vlada Kantona Sarajevo  
Skupština Kantona Sarajevo  
Ministarstvo za obrazovanje, nauku i mlade Kantona Sarajevo  
n/r predsjedavajuća Skupštine Kantona Sarajevo Ana Babić

**PREDMET: AMANDMANI NA PRIJEDLOG ZAKONA O VISOKOM OBRAZOVANJU U KANTONU SARAJEVO**

Poštovani,

U skladu sa članovima 183. do 188. Poslovnika Skupštine Kantona Sarajevo, kao ovlašteni predlagač, u ime Kluba Naše stranke u Skupštini Kantona Sarajevo dostavljam amandmane na Prijedlog zakona o visokom obrazovanju u Kantonu Sarajevo.

Tražim da se Skupština Kantona Sarajevo očituje o predloženim amandmanima u okviru tačke koja će razmatrati ovaj Prijedlog.

Amandmane dostavljam u prilogu ovog dokumenta.

S poštovanjem,

  
**Sabina Ćudić**  
Zastupnica u Skupštini Kantona Sarajevo  
Naša stranka



## AMANDMAN I

U članu 15. dodaje se stav (4) i glasi:

„Predstavnik ministarstva u ekspertnoj komisiji, za rad u ekspertnoj komisiji ne može primati naknadu.“

Predloženi stavovi (4) i (5) postaju stavovi (5) i (6).

**Obrazloženje:** Neprincipijelno je da član ministarstva koji svakako u okviru svog posla obavlja ovakve ili slične djelatnosti, bude dodatno nagrađen naknadom u komisijama pored naknade koju svakako prima za svoj rad a dužnost mu je u okviru posla biti članom ovakvih ili sličnih komisija.

## AMANDMAN II

Član 49. se mijenja i glasi :

„(1) Univerzitet može organizirati studij za sva tri ciklusa studija u saradnji sa domaćom ili stranom visokoškolskom ustanovom.

(2) Visoka škola može organizirati studij prvog ciklusa studija u saradnji sa domaćom ili stranom visokoškolskom ustanovom.

(3) Na zahtjev organizacione jedinice univerzitet može dati saglasnost da jedna ili više organizacionih jedinica organizira multidisciplinami i/ili interdisciplinarni studij.

(4) Na individualni zahtjevi studenta univerzitet može dati saglasnost da jedna ili više organizacionih jedinica organizira multidisciplinami i/ili interdisciplinarni studij za treći ciklus.

(5) U organiziranju studija iz st. (1) i (2) ovog člana, visokoškolska ustanova može realizirati program za sticanje dvojnih ili zajedničkih diploma.

(6) Institut kao organizaciona jedinica visokoškolske ustanove kao javne ustanove može u saradnji sa domaćom ili inostranom visokoškolskom ustanovom odnosno organizacionom jedinicom uz saglasnost univerziteta organizirati III ciklus studija, a može biti suorganizator II ciklusa studija na način i pod uslovima utvrđenim Statutom.

(6) Za realizaciju studija iz ovog člana, visokoškolska ustanova je obavezna, uz prethodno mišljenje senata, pribaviti i saglasnost Ministarstva.

(7) Cijenu studija iz stava (6) ovog člana koji realizira jedna ili više organizacionih jedinica visokoškolske ustanove kao javne ustanove utvrđuje posebnom odlukom visokoškolska ustanova.

(8) Osnivač visokoškolske ustanove kao ustanove cijenu studija iz stava (6) ovog člana utvrđuje na način i pod uslovima utvrđenim statutom visokoškolske ustanove, i o toj cijeni obavještava Ministarstvo.“

### **Obrazloženje:**

Ovim izmjenama ciljano želimo da ostvarimo mogućnost da studenti koji upišu doktorske studije mogu tražiti od univerziteta multidisciplinarni ili interdisciplinarni program koji najviše odgovara njihovom usavršavanju. Naprimjer, ukoliko se neko bavi i stručan je u menadžmentu u zdravstvu te ima želju da završi III ciklus studija koji bi se ticao ove oblasti, može tražiti organizovanje takvog interdisciplinarnog/multidisciplinarnog studija, a koji bi onda obuhvatao nastavu iz oblasti relevantnih za ovakav studij u organizaciji kadrova koje obezbjeđuje univerzitet samostalno ili u saradnji sa drugom domaćom ili stranom visokoškolskom ustanovom. Naravno s obzirom da univerzitet ima pravo da prihvati ili odbije uz adekvatnu argumentaciju smatramo da ovo nije problematično polje a svjetski univerziteti već odavno imaju zastupljenu praksu ovakvih programa. Druga izmjena ovog člana se prvestveno tiče da dupla potvrda vezana za ove programe nije potrebna te da je dovoljno odobrenje od strane Senata univerziteta a ne i Ministarstva.

### **AMANDMAN III**

U čl. 49. dodaje se stav (7) i glasi:

„ Svoju odluku o saglasnosti Ministarstvo je dužno dostaviti podnosiocu zahtjeva najkasnije godinu dana od dana podnošenja zahtjeva.“

Predloženi stavovi (7) i (8) postaju stavovi (8) i (9).

### **Obrazloženje:**

Često se jako dugo čeka na dobijanje saglasnosti Ministarstva. To sve utiče na proces formiranja novih zajedničkih, interdisciplinarnih i multidisciplinarnih studija i u konačnici opet usporava obrazovni proces i stavlja visokoškolske ustanove u BiH u nepovoljniji položaj u odnosu na prohodnost i agilnost obrazovnih institucija u Evropi i svijetu.

### **AMANDMAN IV**

Član 46. se briše.

### **Obrazloženje :**

Smatramo da je poptuno neprihvatljivo da Skupština Kantona kao i dokumenti koje ista donosi imaju bilo kakve efekte na sistem visokog obrazovanja, odnosno ne vidimo na koji način smjernice donesene na Skupštini mogu biti relevantne pored svih drugih institucija koje se bave akademskim usavršavanjima odnosno normama visokog obrazovanja.

## AMANDMAN V

Član 47. stav (6) se mijenja i glasi :

„(6) Nakon stupanja na snagu ovog zakona, rektor licencirane i akreditovane visokoškolske ustanove sa područja Kantona je obavezan jednom u dvije godine dostaviti Ministarstvu pisanu informaciju o poziciji koju visokoškolska ustanova zauzima na relevantnim međunarodnim sistemima za rangiranje visokoškolskih i istraživačkih ustanova, kao i o aktivnostima koje će u saradnji sa rukovodiocima organizacionih jedinica preduzeti kako bi se poboljšala i unaprijedila pozicija visokoškolske ustanove na međunarodno relevantnim sistemima rangiranja.

### **Obrazloženje :**

Prethodno zakonsko rješenje je bilo usmjereno na godišnjim izvještajima koje bi univerzitet bio dužan da podnosi jednom godišnje, smatramo da je dati izvještaj neophodan kako bi se mogao pratiti napredak univerziteta, međutim smatramo da je ovaj godišnji izvještaj pretjerano birokratiziranje, te da je realan rok od dvije godine u kojem se može pratiti rast ili pad univerziteta na datim međunarodnim rang listama. Ovako se smanjuje teret i pritisak na univerzitate, međutim i dalje im ostaje obaveza podnošenja datih izvještaja kako bi Ministarstvo moglo lakše pratiti rast univerziteta sa međunarodnim standardima.

## AMANDMAN VI

U članu 85. U stavu (1) brišu se riječi „ originalna dokumenta“

U istom članu dodaje se stav (5) i glasi:

„ Ukoliko kandidat sa preliminarne rang – liste bude primljen na organizacionu jedinicu druge visokoškolske ustanove, za koju se također prijavio, dužan je da izjavom u pismenom obliku obavijesti organizacionu jedinicu visokoškolske ustanove da više nije kandidat za upis na ovu organizacionu jedinicu visokoškolske ustanove, najkasnije do 29. augusta“

U istom članu stav (6) se mijenja i glasi:

„ Konačnu rang – listu upisanih studenata u svim statusima, visokoškolska ustanova/organizaciona jedinica je obavezna objaviti na oglasnoj ploči najranije 1. septembra.

Rukovodilac visokoškolske ustanove je obavezan Ministarstvu dostaviti spisak svih upisanih studenata u prvu godinu studija na nivou visokoškolske ustanove najkasnije sedam dana prije početka studijske godine.“

U istom članu dodaje se stav (7) i glasi:

„Nakon objavljivanja konačne rang – liste upisanih studenata u svim statusima, prilikom upisa na visokoškolsku ustanovu/organizacionu jedinicu primljeni kandidat predaje originalna dokumenta.“

Dosadašnji stavovi (5), (6) i (7) postaju (6) i (7) i (8)

### **Obrazloženje:**

U dosadašnjoj praksi onemogućavalo se kandidatima za upis u prvu godinu studija da izaberu više studija i na njih se prijave zbog predaje originalnog dokumenta prilikom prijave na konkurs. Problem koji je nastajao u slučajevima kada kandidat nije primljen na jedan studij nema pravo da se upiše na drugi studij do objavljivanja konkursa naredne godine. Ovim rješenjem ukinula bi se takva praksa i omogućilo kandidatima da se prijave na više studija.

## **AMANDMAN VII**

Dodaje se član 153a i glasi:

„Član 153a  
(Ustanove za posredovanje u zapošljavanju)

Redovni studenti imaju pravo na posredovanje u zapošljavanju preko pravnih lica čija djelatnost osigurava cjelovitost i potrebni standard sistema visokog obrazovanja.

Način i uslovi posredovanja u zapošljavanju utvrđeni su **Pravilnikom o posredovanju pri zapošljavanju redovnih studenata** koji donosi ministar 90 dana od dana stupanja na snagu ovog Zakona.“

### **Obrazloženje**

Ovim članom se uređuje pitanje zapošljavanja redovnih studenata za vrijeme studiranja i uspostava ustanova / pravnih lica koja će regulirati posredovanje u zapošljavanju i ispunjavanje prava i obaveza prema državi, kao i sprečavanje malverzacija sa olakšicama koje se tiču zapošljavanja studenata.

## AMANDMAN VIII

Dodaje se član 153b koji glasi:

„Član 153.b  
(Naučno-tehnološki parkovi)

Naučno-tehnološki park je privredno društvo koje se osniva radi komercijalizacije naučnih rezultata i podsticanja saradnje naučnika i privrednika.

Saglasnost za korištenje naziva naučno-tehnološki park daje Ministar.

Naučno-tehnološki park uživa pogodnosti kojim se podstiče ostvarivanje njegovih ciljeva, a u skladu sa Zakonom.

Status naučno-tehnološkog parka i pogodnosti koje uživa uređuju se Pravilnikom o naučno-tehnološkim parkovima koji donosi ministar 90 dana od dana stupanja na snagu ovog Zakona.“

### Obrazloženje

Ovim članom se dodaje mogućnost formiranja nove forme privredno-naučnog organizovanja unutar sistema visokog obrazovanja, a koje će omogućiti ulaganja u nauku i obrazovanje, te direktnu privrednu korist za Kanton Sarajevo.

## AMANDMAN IX

U članu 165. stav (2) se mijenja i glasi:

„Na prijedlog senata visokoškolske ustanove kao javne ustanove i upravnog odbora visokoškolske ustanove kao javne ustanove, Vlada utvrđuje školarinu koju su obavezni plaćati studenti koji sami snose troškove studija u svim statusima i svim ciklusima studija.“

U istom članu stav (5) se mijenja i glasi:

„Postupak koji prethodi utvrđivanju prijedloga odluke od strane senata i upravnog odbora preciznije se uređuje statutom.“

### Obrazloženje

Da bi rješenje bilo konzistentno i u skladu sa stavom (1) potrebno je izmijeniti stav (2), te kao i u stavu (1) odrediti da o školarini i u stavu (2) odlučuje Vlada. Posebno je ovo važno jer je upravo Vlada ta koja je i u nedavnim događajima zaustavila visokoškolske ustanove da imaju nerealne iznose školarina za standard života u BiH i uslove koje nude na svojim organizacionim jedinicama.

## AMANDMAN X

U članu 177. iza stava (1) dodaje se novi stav (2) koji glasi:

“ Student koji je započeo studij po predbolonjskom sistemu studija ima pravo, u skladu sa zakonom, isti okončati do 30.09.2020. godine.”

Predloženi stav (2) postaje stav (3).

### Obrazloženje:

Mislimo da je došlo do greške prilikom formulacije ovog člana i da je između stavova (1) i (2) izostavljen dodatni stav kojim bi se uredio status studenata koji studiraju po predbolonjskom sistemu studija. Jedino dodavanjem novog stava, kako je iznad navedeno, ovako formuliran dosadašnji stav (2) ima smisla u dijelu u kojem govori o navedenom roku.

**Tražim da se predloženi amandmani dostave zastupnicima Skupštine Kantona Sarajevo, kao i predlagaču.**

  
**Sabina Čudić**  
**Zastupnica Naše stranke**  
**Skupština Kantona Sarajevo**

